



Bentiaraq Ottosen

UPA 2026/68-1

Atassut

29. April 2026

Ulluunerani paaqqinnittarfinni tamani inimi ataatsimi atorfiit akuerisaasut minnerpaamik sisamangortinneqarnerisigut aningaasatigut, allaffissornikkullu kingunissaanik ersarissaasumik nassuiaasiornissaannik, Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Olsen, Demokraatit)

Atassummiit qutsavigerusupparput Pipaluk Olsen qulequttamut pingaarutilimmut qaqitsineranut. Ulluunerani paaqqinnittarfiit inuiaqatigiinni toqqammavigaangut, aammalu sulisunut atugassarititaasut toqqaannartumik meerartatta atugarissaarnissaannut eqquisarput ineriartornerannullu.

Atassummiit pitsaasutut isigaarput nassuiaasioqqusilluni siunnersuuteqartoqarnera. Isumaqarpugulli nassuiaasioqqusineq siammasinnerusumik iliuuseqarnissamullu sulii ukkassinerusinnaasoq.

Ullumikkut takussutissartalimmik pioreerpoq ulluunerani paaqqinnittarfinni sulisussanik amigaateqartoqareersoq, atorfiit inuttalerneqarsinnaasaratik. NPK-p nalunaarusiaani 2023-mi maj-mi takussutissaasut ilagaat, 169-nik sineriapput tamakkerlugu perorsaasunik amigaateqartoqartoq, atorfiillu annertuumik inuttalerneqarsinnaasanngitsut. Nalunaarummi aamma tikkuarneqarpoq sulerulunneq, suliaasaqarpallaarneq, malitsigisaanillu perorsaanikkut suliniarnerit pitsaassusaannik naammassinnissinnaanerup killeqalertarnera.

Tamakku tunuliaqutigalugit Atassut isumaqarpoq, nassuiaasioqqusineq taamaallaat ukkassiffiussanngitsoq atorfiit akuerisaasut minnerpaamik sisamangortinneqarnissaannut, kisiannili qanoq annertunerusumik tingussaasumik sulisunik amigaateqarnerup siunissami aaqqiiffigineqarnissaanut.

Misissuineq ilaqarsinnaavoq ilaatigut:

- Qanoq nukittorsarsinnaavarput sulilersitsisinnaaneq aammalu sulisut paariinnarsinnaanerat.
- Suut sinaakkutit piusariaqarpat, ilinniagaqarsimasut toqqartalissappassuk ulluunerani paaqqinnittarfik suliffigissallugu, illoqarfimmiippat inoqarfinniluunniit minnerniippat.
- Sulinermi atugassarititaasut qanoq ittut aammalu aaqqissuussaaneq qanoq ittoq perorsaanikkut suliaqarnermi tapertaanerpaasinnaava.
- Qanoq akeqassava, politikikkullu suut salliunneqarnissaat pisariaqarpat.



Atassummiit pingaartipparput, susassaqarfik salliullugu inuiaqatigiittut ataatsimoorfigisariaqaripput. Ulluunerani paaqqinnittarfiit pitsaasut paaqqinninneriinnarmik isumaqanngillat, toqqissisimanissamilli meeqqanut aammalu ilaqutariit tatiginninnissaannut. Kissaateqassagutta amerlanerusut ilinniarsimasut Nunatsinni suliinnassasut aalajagiisuulluinnarpoq ulluunerani paaqqinnittarfeqassasugut patajaatsunik ilaqutariit Nunatsinni toqqissisimatikkumallugit suliinnaqqullugit.

Taammaattumik Atassummiit kaammattuutigaarput Naalakkersuisut nassuiaasiorlutik suliaqassasut, atorfinnut tunngaannanngitsumik, kisiannili tikkuussisussamik ajornartorsiutigisatsinnut, tigussaasumik kivitsisinaanissaq susassaqarfimmi siunertaralugu.

Tamakku nassuiaatitut tunngavilersuutigalugit Atassummiit siunnersuut taperserlugu ataatsimiititaliamut susassaqartumut sularineqarnissaa innersuussutigaarput.

Qujanaq.